

邓宗隄平定战事记

平定战事记

卷一

PDF

丁酉舊日
彫于武陵

鄧家隊平黔戰事記題詞

粵寇千紀師久無功尙苗竊發首陷思邛

思邛卽印江

公獨仗義

不甘納款抵死與抗輒先右袒登壇誓衆歃血爲盟腰鎌柴
斧悉成利兵躬帥虎威號鄧家隊賊聞落膽不戰而潰俾失
所據焚彼老巢省會始通軍心不搖偷越重圍礮石如雨我
軍適饑塗拾破釜摘彼樹芽圖充一飽救死何爲藉彰天討
賊黨四竄暗伏山凹地寡草樹惟見蓬蒿潛匿聲影值公巡
軍伺其不備百千爲羣公與格鬪所傷在髀匍匐裏創十步
九踣方苦入坎亟賴援救命與神謀兩獲冥祐

記事中有黑
青紅簷兩事

備歷奇窮靡戰不勝天亦厭亂併使歸命底定全黔功將誰
歸公獨不居退讓奚爲我作是贊不愧於色匪貢諛詞用勵
凡百

光緒甲午秋九月武陵楊彝珍拜撰

鄧家隊平黔戰事記序

國家承平日久功業無所施忠憤無所激偉人傑士伏處沉淪
訖無表見驟遇事變羣顧睟眙而後乘時以赴事機之會勳
績爛然此中興以來起文學任將帥者肩項相望一時武健
強力腰弓橫槊陵厲盪決身冒白刃於九死者皆論功受賞
或寄專閫焉然要各隨其所樹立震發其志氣而非徒爲名
高也何其壯哉鄧將軍止侯者黔人也少讀書負奇氣長廢
學倡率義旅支柱危罍出險入艱斬刈猗猗無算以功得職
服官湘楚垂二十餘年獨念鄧氏世儒先文勤公督學黔中

諸昆季多隸門下光緒辛巳

曾桂

由西曹出守衡陽越三年

適將軍調署衡協昕夕相見敦世交焉迄今又將十年宦轍
分羈往來贈答一日書示出所紀戰事囑記於余余爲之輾
然曰此三十餘年事果足以概將軍耶夫君子之於世固求
有以自達其志折衝樽俎與效命疆場一也以將軍之才之
勇其遇似不足以盡之際茲時事方殷海疆不靖暮年烈士
鮮不撫髀擊節思樹一幟以襄戎機矧如將軍者哉吾知其
必瞿然有動於心也故敘及之

光緒二十年甲午秋九月海虞翁曾桂謹序

鄧家隊平黔戰事記

石阡藍廷玉撰述



今湖南常德協副將鄧公名第武字止侯貴州石阡府人也
生有異秉束髮就傅未卒業遂棄而務農咸豐時四川教匪
劉義順倡合土匪構亂於貴州之石阡思南等處公兄弟起
義搜剿直能以少勝衆戰功最著有鄧家隊之名以不事攀
附故歷階不顯而功多掩沒不彰曾見杜君爲公所著戰功
紀略事皆質實惟掛漏尙多或年月顛置予襄事公營最久
頗悉其詳爰卽所記憶者按年編次以俾留心戰事者知所

採擇云

咸豐七年丁巳

先是四川白蓮教匪劉義順漏網竄入貴州陰結龍泉縣姦民何公言稟官以立團爲名偏刀水以上曰覺林團大堡以下曰濟安團江家寨曰致和老團連袤數百里聚黨累萬突於十二月初七日謀反直陷思南府城知府福奎被戕經歷鍾策勲全家十餘口殉難把總趙以成舉人金世瑞赴水死城中男婦死者不勝紀其餘文武各官皆負印以逃同時印江縣亦陷蓋承平日久官民皆不知兵匪勢旣張肆行屠戮

鄉團皆望風納款公時年二十有三卽挾義憤密謀搜勦之舉以勢太孤尙未敢輕動也

八年戊午

孟春劉義順遂自稱老祖祖封公言爲大老闆其子劉么老爲大元帥公言之子繼述爲黔陽王以下遞授僞爵有鄉正元帥將軍千里等曰民苗起應者以巾色青黃白別爲號於是黔省上下游匪蹤幾徧時石阡府城亦陷賊勢益猖風聲鶴唳草木皆兵鄉民晝夜惶惑莫知所措公家在石阡府屬江外之大坪地舊有團曰人和畏匪勢多欲納款免禍公兄

第三人獨抗言曰從賊而生辱甚於死大丈夫甯死不爲也
且我輩世爲良民忍爲匪耶不如齊心抵死相抗我有薄產
願暫供軍食儻得官軍相助一戰而勝同得美名萬一不濟
死亦香耳衆壯其言於是選勇敢者得四十八人卽夜削竿
爲矛歛刀鑱爲短兵令老弱者擊鑼以助聲威劉么老聞之
卽派僞安龍元帥率衆三千突馳而來公出迎擊大破之斬
僞安龍元帥追襲十餘里匪尸枕藉由是聞風反正者踵至
不數日所集不下萬人當逆匪初起屠城略地勢若燎原未
敢當其鋒而公獨一戰而勝劉義順大驚率黨圍攻青岡坡

團衆復解公見人心未固且無險可守乃於二月初八日率所部四十八人歸饒以爵以爵者思南舉人奉府檄辦團練得鄧軍喜甚以公伯兄弟宏充隊長三月十二日以爵督團進鄒河西賊巢鄧軍爲先鋒出思雄關連破賊巢十餘處日暮賊麇至我軍且戰且卻第宏身被十餘創猶持矛以護歸軍賊叢刺之忽踣墮急溜死衆軍歸公不見兄詢及軍士初多諱之繼得實乃躡踊繞隄求尸不得幾不欲生賊復分道襲我後公弟第舉堂兄弟甲與賊戰於許家壩同日陣亡公聞之益悲忿噴血死而復甦入白饒曰兄弟皆死於賊何敢

獨生願分軍殄逆報讎且賊已分股襲我後可乘虛搗之亦
釜底抽薪法也饒哀其志善其策許之俾補隊長

九年己未

正月初九夜公率隊由石板灘潛度直攻木搖山一帶歷五
晝夜埽平橫巖銀匠洞各寨生擒僞梁元帥及將軍鄉正等
三十餘名戮之投誠者數千人賊氣大阻自是每交鋒賊見
鄧字旗輒先潰且自譁曰見了鄧家隊教人膽先碎公漸次
收復許家壩等處爲根本分營爲前八後四招集逃亾墾荒
設險流徙漸歸賊從此不敢犯其界時全省糜爛團民多反

側不常能始終如一獨保一方者惟公一人以下游道路梗塞軍書必繞湖南廣西始達省故公縱橫賊中大小百餘戰而名未上達久之提督蔣公玉龍由四川來援始錄功給以六品軍功旋因賊目劉么老率賊數萬屯岑頭蓋其地危峯矗立徑險難上廣衍可三百里公合軍駐大金頂進剿閱三旬破之殲悍賊甚夥劉么老敗歸江家寨老巢公招撫木堯坡闌干子馬腹嶺楊家均等十餘屯降民復業賊益不敢逞矣

十年庚申

二月濟安匪首僞元帥黃三毛率衆犯安化縣屬之牌坊小溪捲子坪等處知縣汪公麗金調公往援二閱月收復所失坵寨招回降民萬餘戶擒斬不勝計尋又赴印江知縣繆公星槎之召時賊據凱塘板溪四方團丁集援者謀斷賊歸路而賊乃以數萬衆扼令牌山使我軍前後不得伸縮繆公困極見公流涕爲言賊鋒銳甚不得交睫者一月有奇公卽率鄉導引所部二千人分隊進剿一由板溪場一由小井場期明會令牌山巖口團丁先至者凡十三起見公旗幟皆豎旗鳴鼓以應公悉力奮擊賊大潰骸胔山積我軍合團丁亦多

死傷明日復搜殲餘賊會四川貓貓山郎官郎宦皆僞王也縱橫出掠據印江之天堂哨繆公復促公往從者五百人至則賊驚夜遁我軍追至隘門坡與四川援軍合因雨雪所阻二閱月不能戰公率本部回許家壩時提督田公興恕督辦貴州軍務飭總兵熊公煥章統虎威虎翼等軍議由許家壩進師於十一月二十五夜初更抵境遂首檄公督帶虎威前軍爲鄉導揀得精銳五百名出思雄關襲取饒鉢頂所謂兵貴神速攻其無備也時凍沍漫天泥淖沒跽我軍潛行渡河密越太和營賊地直抵饒鉢頂適屆五鼓賊已疲懈前隊遂

縱梯登壘放火俄頃火光勃發號礮齊鳴後隊合力喝進當
將該巢攻破賊共驚竄公卽麾衆衝突斃賊無算天明他地
賊復來爭正接戰間而大軍適抵關上賊怯潰奔公乘勝夾
攻太和營克之遂不避雪雨連日攻破附近之天池坪毛栗
坨四野地一帶賊巢不閱月卽攻破江家寨老巢及大小尖
山將臺四方頂官壩茶溪溝等處招撫降民以萬計使各安
耕作省道始通

十一年辛酉

公正勦撫得手忽分勦河西之總兵金公泰文總兵吳公宏

勝由文家店渡河約至江家寨會師既深入糧匱賊歸者復
叛事急請師熊公煥章派星馳往抹公立提數十人沿途奪
賊食冒圍數重而熊軍後應不繼賊來益衆兩相紛拏礮子
如雨公立赤日中督戰殺賊甚多飢不得食取破釜摘道旁
草芽煮之右手持矛目注賊左手攫草芽且食且戰俄而金
吳二營俱潰吳公爲賊所執公忿勢孤不支遂由間道退賊
不敢逼陰伏礮於夾道俟公過擊之中骹賊擁至將加刃公
急躍起手矛刺二馬賊餘悉駭遁我軍追殺十餘賊始歸時
公左右股皆洞穿血淋漓漫足猶負痛騎行而賊中皆傳公